

**Pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamik Naalakkersuisut peqquneqarnissaannik Inatsisartut aalajangiiffisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.**

*Inatsisartunut ilaasortamit Anna Wangenheimimit saqqummiunneqartoq*

## **pillugu**

**Inuussutissarsiornermut Aatsitassanullu Ataatsimiititaliap**

**siunnersuutip aappassaaneerpeqarneranut**

## **ISUMALIUTISSIISUTAA**

Ataatsimiititaliap suliarinninnermi [kingullermik] ilaasortarai:

Inatsisartunut ilaasortaq Karl Tobiassen, Siumut, Siulittaasoq  
Inatsisartunut ilaasortaq Bentiaraq Ottosen, Atassut, Siulittaasup tullia  
Inatsisartunut ilaasortaq Kristian Jeremiassen, Inuit Ataqatigiit  
Inatsisartunut ilaasortaq Mariane Paviasen Jensen, Inuit Ataqatigiit  
Inatsisartunut ilaasortaq Lars Poulsen, Siumut  
Inatsisartunut ilaasortaq Kuno Fencker, Siumut  
Inatsisartunut ilaasortaq Pele Broberg, Naleraq

UKA2024-mi ulloq 22. oktober siullermeerinninnerup kingorna ataatsimiititaliap siunnersuut misissuataarpaa.

### **Siunnersuutip imarisai siunertaalu**

Siunnersuutip akuerineqarneratigut Naalakkersuisut peqquneqassapput pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamut.

**Siunnersuutip Inatsisartuni siullermeerneqarnera**

Pisortat namminersortullu suliffeqarfiini sullivinni avatangiisit pitsaasut qularnaarneqarnissaannik siunnersuuteqartup siunertarisaa amerlasuunit ilalerneqarpoq. Siunnersuutilli itigartinneqarnissaanut amerlanerussuteqartoqarpoq. Siunnersuutip suliffeqarfinnut namminersortunut mikinerusunut aningaasatigut allaffissornikkullu kingunerisinnaasai immikkut ernummatigineqarput. Sullivinni avatangiisit pitsaasut qularnaarniaraanni siunnersuut pitsaanerpaajunngitsoq oqaatigineqarportaaq. Sullivinni avangiisit pitsaasut qanoq qularnaarneqarsinnaanersut, taamatullu aamma sullivinni avatangiisinut tunngasut Kalaallit Nunaannit oqartussaaffigineqalertariaqannginnersut oqallisigineqarluarput.

Naalakkersuisut akissuteqaamminni oqaatigaat Sullivinnik Nakkutilliisoqarfiup paasissutissiissutigigaa sulilerlaat tamarmik ilinniartitaanermut peqataasarnissaat aningaasaqarnikkut annertuumik nammakkiissasoq, taamatullu aamma taamak annertutigisumik ilinniartitaanernik neqerooruteqarnissamut Sullivinnik Nakkutilliisoqarfik sulisussaqaanngitsoq.

Naalakkersuisut tulliuuttumik allannguutissatut siunnersuuteqarput:

*”Naalakkersuisut siunissamut sammisumik qanoq suliaqarnissamut pilersaarusiorniartutik 2025-mi suliffeqarneq pillugu isumasioqatigiinnermi sammisaq sullivinnik avatangiisit oqallisigineqarnissaanik Naalakkersuisut peqquneqassasut.”*

Tamanna tunngavigalugu siunnersuut Inuussutissarsiornermut Nunalerinermullu Ataatsimiititaliamut sulianeqartussanngortinneqarpoq.

**Ataatsimiititaliap siunnersuummik suliarinninnera**

Siunnersuuteqartup siunertarisai ataatsimiititaliap ilalerpai, isumaqarlunilu sullivinni avatangiisit pitsaasut pingaarutilerujussuusut.

Ataatsimiititaliap maluginiarpaa siunnersuutip itigartinneqarnissaanut amerlanerussuteqartoqarpoq.

Naalakkersuisut allannguutissatut siunnersuutaata kingunerissavaa Naalakkersuisut peqquneqassammata sullivinni avatangiisit 2025-mi suliffeqarneq pillugu isumasioqatigiinnissami qulequttatut ilannguteqqullugit. Taamaaliornikkut siunertarineqarpoq qulequtaq eqqarsaatigalugu Naalakkersuisut siunissamut sammisumik qanoq suliaqarnissamut pilersaarusiornissaat. Ataatsimiititaliap maluginiarpaa siullermeerinninnermi amerlanerussuteqartut Naalakkersuisut allannguutissatut siunnersuutaat ilalermassuk.

Ataatsimiititaliap paasinninnera unaavoq isumasioqatigiinneq nassuiaasiiornermit eqaannerussasoq, isumasioqatigiinnermimi suliniutit aalajangersimasut sullivinni

avatangiisinik suliffeqarfimmillu iluarisimaarinninnermik pitsanngorsaataasinnaasut oqallisigineqarsinnaammata. Suliffigissaaneq pillugu siunnersuisoqatigiit isumasioqatigiinnermut peqataatinneqarnissaat ataatsimiititaliap pingaaruteqartut isigaa. Naggasiullugu ataatsimiititaliap Naalackersuisunut kaammattuutigaa sullivinni avatangiisit pillugit malittarisassat atuuttut pillugit paasisitsiniaanermik aallartitseqqullugit.

### **Siunnersuutip aningaasatigut kingunerisassai**

Inatsisartut Suleriaasianni § 33, imm. 1-imi aalajangersarneqarpoq aalajangiiffigisassatut siunnersuutip timitalerneqarnerata aningaasatigut allaffissornikkullu kingunerisassai siunnersuummut tunngavilersuutini allaaserineqarsimassasut.

Ataatsimiititaliap maluginiarpaa tamanna naapertorlugu siunnersuutip timitalerneqarnerata aningaasatigut kingunerisassai siunnersuummi oqaatigineqarmata, taamaalillunilu aningaasartuutit ilinniagartuup ukiumut akissarsiaanit 500.000 kr.-inut naapertuuttunit amerlanerunnginnissaat naatsorsuutigineqarluni.

### **Ataatsimiititaliap inassuteqaatai**

- Ataatsimiititaliami amerlanerussuteqartut Inuit Ataqatigiinneersut, Siumumeersut Atassummeersullu Naalackersuisut allannguutissatut siunnersuutaat akuersissutigineqarnissaat inassutigaat
- Ikinnerussuteqartut Naleqqaminngaanneersut siunnersuutip itigartitsissutigineqarnissaa inassutigaat

Taamatut oqaaseqaateqarluni isumaliutissiisummilu allassimasutut paasinnilluni  
ataatsimiititaliap siunnersuut aappassaaniigassanngortippaa.

---

Karl Tobiassen  
Siulittaasoq

---

Bentiarq Ottosen  
Siulittaasup tullia

---

Marianne Paviassen Jensen

---

Kristian Jerimiassen

---

Lars Poulsen

---

Kuno Fencker

---

Pele Broberg